

## Indira Šabić | Biografija

Indira Šabić je nakon osnovnog i srednjeg obrazovanja u Tuzli, diplomirala 2010. godine na Odsjeku za bosanski jezik i književnost Filozofskoga fakulteta Univerziteta u Tuzli. Iste godine upisala je poslijediplomski studij Jezikoslovlje na Filozofskome fakultetu Sveučilišta Josipa Jurja Strossmayera u Osijeku (Republika Hrvatska), gdje je doktorirala 2014. godine, stekavši zvanje doktorice humanističkih nauka iz polja filologije. Na Odsjeku za bosanski jezik i književnost Filozofskoga fakulteta u Tuzli radila je kao stručnjakinja iz prakse akademske 2012/2013. godine. Odlukom Senata Univerziteta u Tuzli 2013. godine bira se u zvanje asistentice, a 2017. godine u zvanje docentice za uže naučno područje *lingvistika*. Od 2021. godine članica je Redakcije časopisa Književni jezik kojeg izdaje Institut za jezik Univerziteta u Sarajevu.

Autorica je knjiga *Antroponimija i toponimija bosanskoga srednjovjekovlja* (2017. Dobra knjiga, Sarajevo) i *Prezimana u Bosni i Hercegovini* (2020. Off-Set, Tuzla), i više naučnih radova u domaćim i regionalnim (Austrija, Crna Gora, Hrvatska, Mađarska, Rumunija, Srbija) časopisima i zbornicima skupova. Sudjelovala je kao izlagačica na velikom broju domaćih i međunarodnih naučnih konferencija, simpozija i okruglih stolova. Piše poeziju i prozu, a njezin tekst *Dodolino daždovanje* napisan za Međunarodni festival savremenih kratkih književnih formi (2021) u organizaciji Instituta za nauku, alternativu, kulturu i umetnost – INAKU iz Skoplja (Sjeverna Makedonija), objavljen je u *Antologiji savremenih kratkih književnih formi*.